

四庫全書

集部

欽定四庫全書

集部

陳剛中詩集卷三

詳校官中書臣羅錦森

侍讀臣孫球覆勘

總校官檢討臣何思鈞

校對官中書臣蔡廷衡

謄錄監生臣杜羣玉

欽定四庫全書

陳剛中詩集卷三

元 陳孚 撰

玉堂藁

偕翰林學士劉東崖禮部侍郎李兩山登憫忠寺

閣

天京朝萬國十二舜神州宮闕開中禁關河拱上游扶  
桑彤氣近析木紺光流劒佩千牛衛旌幢五鳳樓玉泉

蟠地湧金塔插天浮北嶽瑤符出南溟瘴霧收人皆躋  
壽域我亦步瀛洲智不如犀首癡猶過虎頭帝恩難獨  
報儒術幸同傳偶此登阿閣悠然望薊丘長庚欣識李  
太白願依劉雪擁飛狐夜風號涿鹿秋黃花堆徑濕紅  
葉帶城幽且盡一壺酒掀髯送白鷗

中書大丞相安公延說四書因以詩呈

帶礪家聲耀八寰中書獨押紫微班捧持日月祥雲上  
汎滌山河湛露間綠竹正歌淇澳美赤松聊伴穀城閒

聖門別有經綸事更對青燈話孔顏

同國子司業王士能監丞滕仲禮謁南城文廟觀  
周宣王石鼓各模數本以歸

退之昔為石鼓歌子瞻亦嘗咏石鼓我從江右遊京師  
眼見石鼓心欲舞周室中興流彘餘盡復蒼姬舊疆土  
大蒐岐下選車徒虎賁三千健於虎想當刻石紀勛時  
載命臣籀臣吉甫豈惟猗那清廟詩要紀豐功繼下武  
兌戈和弓無復存此獨不磨耀千古鯉鯢貫柳字斑斑

勢如雷文斲天斧由漢訖唐棄草菅大觀輦致圖書府  
黃金填畫失之奢金輪已整黃河櫓燕山潭潭素王宮  
太史夜奏神光吐誰知至寶在人間乃是鳳篆龍章祖  
我皇御天開三雍石渠金馬列李杜鼓昔有十今存七  
搜剔崖藪尚可補小儒更有筆如椽作元一經配鄒魯  
呈性齋左丞馬公

我我崑崙圃乃在天中央絳樓十二級浮空爍琳琅中  
有仙人霞冠青霓裳兩手握元化翊此日月光箕以

播清飈斗以傾天漿蒼生愚何知但覺太極長海亦不  
可極山亦不可量安得分刀圭滌我塵土腸

晨登繫巫閭回望燕南垂碣石無飛埃滹沱清漣漪天  
子坐明堂十二藻火衣千官擁雉尾佩劒光陸離南海  
翥朱鳥東海翻蒼螭銅池亦何有五色光明芝大哉惠  
澤流菌蠢亦熙熙誰憐向陽者一寸園中葵

出自薊北門巍城鬱崔嵬大車如游龍翠蓋浮紅埃堂  
皇十二衢中有千仞臺黃金不復見凍雨深蒼苔偉哉

千載人結址羅英材精誠貫白日鐵石為之開願為雙  
黃鵠奮起凌蒿萊

呈閻靜齋學士

四海文聲重泰山十年忠讜侍龍顏  
屢分天上金蓮炬獨占人間玉筍班  
麟筆露寒青簡濕鳳章雲謁紫泥閒  
孤帆已有東風便喜近蓬萊碧水間

承旨野莊董公殊勲清節孚聞之縉紳紀以八詩  
盟府旂常策世勲一門忠孝氣凌雲衣冠盛事誰堪比



漢後元間萬石君

鐵馬長驅棧路高捷旗飛渡大江  
濤漢南烟柳蓬婆雪  
猶識團花舊戰袍

手分恩露活惇嫠春滿棠陰犬有羗  
二十年間如昨日  
兒童猶誦衛州碑

正色鴛行第一人危言耿耿聳朝紳  
忠州不負平生學  
曾與皇家去佞臣

黑豸冠裁柏署陰誰知偃月蓄機深  
九重堯舜明如日

獨照生來鐵石心

鄭公已拜大司農  
倏捧詞林詔墨濃  
自是玉皇香案吏  
仙班合領六鼇峰

不負朝廷七十年  
樓臺無地榻蕭然  
清名當與溫公並  
只欠河南二頃田

萬卷青燈味道腴  
苦心欲探魯鄒餘  
朝回立馬天衢上  
又典春衣買異書

偕承旨野莊公學士劉東崖侍講張西巖遊慶壽

寺憇僧牕有作

金碧樓臺護紫霞一塵不到小牕紗  
老僧倚杖對疎竹童子抱琴眠  
落花風起亂飛千萬蝶日斜閒啄兩三鴉  
自知不是名韁客消得曹溪一滴茶

八月朝回呈學士閤靜齋李野齋趙方塘

十二光明闕神仙奠巨鼇風清雙雉扇天近五龍袍  
玉斧紅雲合金莖碧露高聖明千載會喜色動旌旄  
獸舞龍墀下青杉葉半枯九重明主聖八品小臣孤鵲

但依三帟鷹猶待一呼每慙僚吏問袖有諫書無

得家書寄呈可翁家兄

風南枝北雨沉沉忽有書來似萬金三十年間聽雨夢  
八千里外望雲心舊書尚喜黃盈架先隴應添碧滿林  
若問客游新況味紫薇花發玉堂深

燕山除夜簡唐靜卿待制張勝非張幼度編修

萬井笙歌徹曉聞千官待漏夜紛紛奴星有柳祠窮鬼  
臣朔無柑遺細君長樂鐘聲敲碧漢廣寒簾影捲紅雲

自知報國無他技，賴有詩書可策勲。

慶壽寺有小殿，榜曰聖容。奉誌公泗州二菩薩，皆真身所塑也。元在江左，金梁王宗弼取置于此。

煌煌朱雀闕，金榜瑤宮開。中有二梵士，巍坐芙蓉臺。秣陵安樂禁，松頂靈禽胎。紫帽姓何人，適從何國來。胡為悉萃此，雪面淨黃埃。惟金名王子，仗鉞征南回。兵鋒烈於火，所至山岳摧。遂令千載骨，亦復罹其災。至人身無寄，如水浮枯荻。無往亦無去，澹然不可猜。但有古刀尺。

天機妙刺裁坐閱金世祚變滅同寒灰聖容儼如故伊  
人安在哉稽首一笑梁檜露滴蒼苔

野莊公與孚論漢唐以來宰相有王佐氣象得四  
人焉命孚為詩并呈商左山參政謝敬齋尚書  
諸葛孔明

當塗哮吼健於虎卯金一脉如寒土民間只有大耳兒  
真是高光宗祐主南陽笑脫青蘿衣出試烏林萬火炬  
永安受遺輔太子漢賊未誅忠膽苦峨眉山高錦江寒

白旄一麾招搖怒出師兩紙流涕書三代而下無此語  
中營若不墜長星何止逆雛鸞征鼓定知盛事繼蒼姬  
禮樂光華曜千古

謝安石

典午叔世失綱紐紫髯老奴垂涎久謝公笑麾九錫文  
姑熟一夜骨已朽繼以草付臣又土九十六萬猓獠吼  
白羽從容別墅棋破賊只在一尊酒長淮西風夜鶴鳴  
坐閱兵車見雲母自古鑒國到危殆始見擎天活人手

誰能白刃在頸時正色毅然以死守如公信是社稷臣  
定論要期千載後

裴中立

唐自天寶藩臣強關東割地尊犬狼憲皇赫怒思賢佐  
十載始得緋衣郎六龍夾日升黃道魑魅誰敢爭天光  
惟有蔡州煽逆焰假鉞一指孤臣亡瘦骨昂昂五尺長  
四夷聞名驚欲僵垂紳搢笏坐台席隱然一身佩巨唐  
唐家太常紀勲烈後有西平前汾陽誰如公探皇王祕



笑晚伊召躋羲黃

司馬君實

熙寧誤相老安石惡政變盡法三尺頭會箕斂禍尚可  
動驅赤子陷鋒鏑端明相君從西來大梁草木亦動色  
紫簾中坐女堯舜甘雨一洗大地赤平生受用惟忠貞  
妻無完裙面如腊十年布衾二頃田走卒兒童服至德  
誰將誣語仆魏碑丹心自有蒼蒼識至今涑水一卷書  
尚為乾坤立人極

翰苑薦為應奉文字二十韻謝大司徒并呈諸學

士

天上金鑾客人間第一流  
贊為唐內相禹拜漢元侯  
鯢海三千水龜峰十二樓  
月寒紅燭夜風淡紫薇  
秋鳳誥窺姚姒麟篇振魯鄒  
佩隨宮漏遠衣染御煙  
浮淑氣騰奎壁祥光射斗牛  
焜煌青瑣闥縹緲紫霞洲  
瑪瑙濡堯璽珊瑚耀漢鈎  
駝蹄中禁釜豹尾上方騶  
僕本師黃卷生惟伴白鷗  
親庭雙鶴髮家事一漁舟  
偶預天官選來

為帝里遊綠章蒙獨薦青史許同修故郡驚王勅新豐  
異馬周隊隨魚圉圉角喜鹿呦呦勢似飛三鳳功如輓  
萬牛桑榆終有望葑菲未為愁國士恩難報書生志易  
酬誓堅冰雪操正色贊皇猷

聞胡紫山被召以詩寄呈

明良千載事際會古尤艱海岳歸皇極乾坤見紫山就  
湯三聘後若孔一瓢間願為蒼生起休辭鬢雪斑

史館暮春有感呈承旨野莊公

滿篋詩章未必傳微官束縛正堪憐  
蘿蕪滿院又三月  
首宿堆盤無一錢  
洛邑家書黃犬上巴山舊業子規前  
夜聽兒女青燈話似覺朱顏老去年

呈承旨忠齋留公以樂只君子遐不眉壽為韻成  
詩

大極生乾坤萬化一橐籥孰為萬化宗  
天其付先覺偉哉百世士逸響振木鐸  
深衣花木間清風藐獨樂

皇皇六合間不朽惟此理至人妙氣機  
乃見混沌始

風七十年鶴髮映兒齒誰知玉雪胸千載矢天只

公昔坐黃閣玉鉉宣殊勲今居石渠署袖手看浮雲出  
處固有意豈令俗子聞但持方寸丹期以酬明君

聖明握龍御六合混文軌麟閣有老臣國脉長在是峨  
峨太華山浩浩黃河水寂寥百年間今見歐陽子

仙人白玉闕踏月戲紫霞坐閱東海水秋風捲塵沙爛  
柯亦偶爾人世驚咨嗟龍漢劫運長誰能測幽遐

蓬萊在何許縹緲烟濤浮飛仙駕颺輪徑踞金鰲頭手

攜五色筆遊戲三千秋回語枋榆鷄識此逍遙不

小草有臭味願附青松枝況我三世間受此露雨滋家  
庭有勝事陶冶非公私稽首拜牀下喜色津鬚眉

神京三月春光風滿宇宙曉視紫薇庭寶烟篆金獸豈  
無魯侯詩昌熾今猶舊願泛玻璃卮起舞為公壽

哭菊山學士

太乙青藜命世儒枕中鴻寶定何如三年席上陪金馬  
一旦階前墜玉魚益部已空耆舊傳洛陽猶誦治安書

蒲輪昔日盧龍道忽見秋風送旄旗

呈李野齋學士

青蓮居士長庚星手扶河漢翻滄溟天子呼來紅潮湧  
冰唾濺几玻瓈聲仙人上天不可見耳孫更侍金鑾殿  
欲補十二龍火衣袖中別有五色線上帝冊府紅玉田  
宮鬢對捧芙蓉烟彩毫草就雞竿詔商雲赤遶寥陽天  
江南客子年三十布袍鴉黑秋霜濕欲買俠骨無千金  
雄龍一夜銅花泣今朝出門忽瞻驚後五百載逢長庚

安得剛風九萬里從公橫騎太乙鯨

呈傳初庵學士

天不生先覺斯文孰指南一朝真學士四海老初庵  
福備康寧五尊兼爵齒三年年衿佩合庭下祝彭聃

霖雨商巖佐經綸百世餘又騎箕尾宿來主壁奎書社  
稷周皇極衣冠漢石渠夜聞宣室召溫詔賜安輿

李尚書有唐畫飛燕姊弟為嬌困相倚之態

玉鸞支枕珊瑚几綠鬢微困嬌相倚太液東風扶不起



一雙芙蓉裊秋水粉痕誰寫溫柔鄉淺蛾對感烟峰長  
意中似有赤鳳凰唾花猶濺榴裙香合歡繡帶飄金縷  
含情兩兩春無語冰魂縹緲空千古月落鴛鴦渡南浦  
辛卯天壽聖節孚應制草前行樂章曰至聖至明  
之曲樂令張溫以弦管至翰苑調集之壬辰元  
會亦孚撰進曰金階萬歲聲敬紀以詩

我本漁樵東海邊腳踏雲頭歌扣舷數載偶承金馬詔  
朝衣路舞丹墀前三十六簷列兩序黃鐘大鑪儼在懸

擬宮扣羽韻雜還泠泠間以朱絲絃紫衣樂使總干立  
翠衫迴電風翩翩白雪一聲度霄漢宛如戛玉聲琅然  
曲聲未已笙簫急滿空嘹亮清而圓又如疎松亂石內  
崖冰迸落千丈泉景星出房慶雲爛重華盛德三千年  
野人忽聞靈韶調但覺魂夢遊鈞天去年協律攜管籥  
按賡至聖至明篇今年又奏金階曲瑤卮大宴蕊珠仙  
恭惟皇元混六合八音均和八風宣徽臣何幸際昌運  
得與麟鳳瞻初筵惟願聖明億萬壽瑞光長照太微躔

二詞  
附見

至聖至明之曲

黃鍾宮

鬱羅瑤文凝瑞虹中黃御陽貝闕珠宮漢盤寶露濃香  
浮太液芙蓉天九重萬國衣冠會同旒光一點海霞紅  
太平日月軒轅紀藐皇風崆峒

金階萬歲聲

夾鍾宮

絳幘籌催觚闕上暖迴虬箭聽鳴鞘聲傳鳳輦宮花開  
蟬玉戚朱弦擁紅雲遶黃金殿皇國萬年泰階平六符

輝現滿神州和風乍轉天開雉扇玉簫聲顫奉蟠桃慶  
瑤池宴

感懷呈龐夷簡修撰張幼度應奉

濫直承明署身閒似地仙雖無官長罵未敢酒家眠瘦  
已寬朝服貧須乞酒錢最愁親舍遠夢遶白雲邊

五湖烟浪濶短棹早歸休有母思臣密無人問客周關  
河雙髻晚風雨一燈秋留取金鑾夢寒汀對白鷗

李妃妝臺歌

南城之西臺巍巍欲問何代築者誰臺前老叟為我語

創自泰和明昌時

金章宗年號

道陵御宇思傾國

道陵章宗陵名

掖

庭矮媚千蛾眉其中榮寵震天下依稀憶得李宸妃朝

陪金根輦升殿夕則專御流蘇幃一月日邊明炯炯

章宗

與妃共對妝臺口占曰二人土上坐  
令妃對應聲曰一月日邊明帝大喜

六宮珠翠無光輝

恩禮殊絕與后等但無副笄翬翟衣少嘗沒入宮籍監

本妃論妃家閥何卑微腐木作柱古所戒胡乃重色輕

國為斯臺實昔湯沐地瓊臺開鏡迎朝曦想見雙蟬綠

委地蘭釵半墮湘雲垂麝臍龍髓嬌不盡腰肢柳裊一  
尺圍雪艷透膚膩紅重仙姿何待鉛華施妝成獨對東  
風笑藕花一朶開連漪君王濃香夢魂裏紫宸晏朝酣  
不知諫臣當時盡結舌空有伶者為嘲譏

伶官當對御  
叱飛禽曰鳥

鳥你只  
向裏飛

一朝房山弓劍墜燕飛啄矢不復遺衛王有詔

下永巷太阿無情血淋漓妖容寸斬何足惜金源自此

鴻圖衰寶鈿零落今安在露桃猶似濕胭脂武元辛勤建

大業

武元金  
太祖謚

子孫一笑寒灰飛臺非不高築亦壯無奈

社稷基先隳我聞叟語忽驚起謂叟不必苦嗟咨君不見  
縶弧箕服亡周國古來何限褒龍榮

與李子構讀開元天寶遺事

四十乾坤拱紫宸東風只屬倚闌人玉鳬波煥驪山曉  
金犢烟橫繡嶺春七夕有釵留羽客千秋無鏡泣孤臣  
紅塵一騎君休笑中有漁陽萬騎塵

為靜齋學士講壽

大赤冲氣開鴻濛仙人飛下方諸宮蒼麟吐書衛青童

從以丹篆金芙蓉仙人炯炯雙碧瞳珠庭鼎角冰雪容  
倒瀉銀潢沃筆鋒玉栢繁露凌星虹絳紗鸞扇天九重  
翠鳳銜出芝泥封賜以冊府羣玉峰七寶之牀雙蓮紅  
春光蕩淡薇花風肺肝一鏡磨寒銅行須便歸碧紗籠  
永為四海斯文宗我來滿泛玻璃鍾更無諂語歌祝雍  
君不見孔孟之道與天通願身任此傳無窮

出健德門赴上都分院

北樓急鼓絕南樓疎鐘鳴鹽櫛未及竟駟官戒晨征三



年去鄉井已覺身飄零今朝別此去又有千里行懷君  
豈不願王命各有程小車如雞栖軋軋不得停出門見  
居庸萬仞參天青鄰家三數姬對我清淚傾問我善飯  
否慮我衣裘輕大笑揮之去我豈兒女情

觀光樓

試上危樓望東風尺五天一溪寒瀉月萬壑暝含烟古  
塞黃雲外魏臺白雁邊誰憐家萬里有客擁衾眠

龍虎臺

雙塔聳琅玕星辰手可攀偉哉丹鳳輦駐此巨鰲山地  
拱中黃上天回太紫間微臣遙稽首想像見龍顏

昌平縣狄梁公廟

七尺衣冠儼古祠一生身佩國安危至今遼海殘霞外  
猶有虞淵取日時

居庸關

車稜稜石角角車聲彭彭鬬石角馬蹄蹴石石欲落不  
知何年鬼斧鑿僅與青天通一握上有藤束萬仞之崖

下有泉噴千丈之壑太行羊腸蜀劒閣身熱頭痛懸度  
索一夫當關萬夫卻未必有此奇巘崿吾皇神聖混地  
絡烽火不紅停夜柝但有地險今猶昨我扶瘦筇息倦  
脚欲叩往事雲漠漠平沙風起鳴凍雀

彈琴峽

月作金徽風作絃清聲豈待指中傳伯牙別有高山調  
寫在疎松亂石邊

仙人枕

金史卷之三  
居庸萬馬遶山前未必蒼苔睡晏然見說華山風日暖  
何如移伴白雲眠

懷來縣

榆林青茫茫寒烟三十里忽聞雞犬聲見此千家市石  
橋百尺橫其下跨瀉水人言古瀉州殘城無乃是民家  
坐土牀嬉笑園老稚糲飯脩山葱勸客顏有喜足跡半  
天下愛此俗淳美醉就軟莎眠夢遊葛天氏

統幕

千里茫茫草色青  
亂塵飛逐馬蹄生  
不知何代開軍府  
猶有當年統幕名

洪贊井深有六七十丈者

洪贊山岩崑勢如舞  
雙鳳大井千尺深  
窈然見空洞野人  
驅十牛汲以五石  
甕滴水寶如珠一  
甕十室共我生  
海東頭漣漪飽清  
弄嘗聞惠山泉萬  
里駟騎送急呼茗  
枕來試作清淨供

鵬窠道中

曉馳漠北暮居庸千里山河一瞬中江左故人知我否  
馬蹄聲裏過秋風

車外塵沙十丈黃車中客子黑貂裳拂雲堆上閒回首  
無數征鴻帶夕陽

桑乾頌

昔聞桑乾名今日登桑乾桑乾是否不必問但覺兩耳  
天風寒大峯小峯屹相向空際豁訝一千丈燕雲回首  
夕陽間長川歷歷平於掌人家如蠣粘石壁白土堆簷

高半尺門外羶車風雨來平地轟轟驚霹靂漢唐百戰  
場綠草今滿磧野夫耕田間猶有舊鐵戟道傍誰歎三  
歎息古袍古帽江南客

李老峪聞杜鵑呈應奉馮昂霄

三月十九日客行桑乾坂杜鵑啼一聲清淚淒以潛故  
園渺何處萬里隔雲巘燕子三見歸我車猶未返杜鵑  
爾何來弔我萬里遠同行二三子相顧一笑莞問我此  
何鳥怪我苦悲惋掉頭不復言日落千山晚

赤城驛

一溪流水遶千峰  
宛與天台景物同  
魂夢不知家萬里  
却疑只在赤城中

雲州

天險龍門峽  
懸崖兀老蒼  
千蹄天馬躍  
一寸地椒香  
夜雪青羶帳  
秋烟白土房  
路人遙指語  
十里是溫陽

獨石

何載天星墮  
綠苔千尋忽作鐵  
崔嵬風沙道上人  
誰識



曾見天台雁蕩來

秦長城

馳車出長城飲馬長城窟朔雲黃浩浩萬里見秋鵲白  
骨渺何處腥風捲寒沙蒙恬劒下血化作川上花祖龍  
一何愚社稷付征杵長城土未乾秦宮已焦土千載不  
可問但聞鬼夜哭矯首武陵源紅霞滿川谷

金蓮川

金章宗與李妃避暑  
于此有泰和宮今廢

茫茫金蓮川日映山色赭天如碧油幢萬里罩平野野

中何所有深草臥羊馬昔人建離宮今存但古瓦秋風  
吹白波猶似哀淚洒村女采金蓮芳香紅滿把豈知步  
蓮人豔骨掩泉下人生如蜉蝣百年無堅者安得萬斛  
酒浩歌對花瀉

明安驛道中

野鵲山頭野草黃野狐嶺上月茫茫五更但覺天風冷  
帳頂青氊一寸霜

貂鼠紅袍金盤陀仰天一箭雙天鵲雕弓放下笑歸去

急鼓數聲鳴駱駝

黃沙浩浩萬雲飛  
雲際草深黃鼠肥  
貂帽老翁騎鐵馬  
胸前抱得黃羊歸

風吹灤水湧如淮  
十萬雕弓飲馬來  
長笑一聲鞭影動  
金鞍飛過李陵臺

李陵臺約應奉馮昂霄同賦

落日悲笳鳴陰風起千嶂  
何處見長安夜夜倚天望  
臣家羽林中三世漢飛將  
尚想甘泉宮虎賁擁仙仗  
臣豈

負朝廷忠義風所尚橫天青茫茫萬里隔亭障可望不  
可到血淚墮汪漾空有臺上石至今尚西向

夜宿灤河背兜

貂裘塵土黑如鴉海角孤臣扈翠華萬里親庭應鶴髮  
一生客路又龍沙囊中粟捲從蓉葉盤裏蔬堆芍藥芽  
漸見馬前添喜氣五雲天近玉皇家

桓州

躍馬長城外方知眼界寬晴天雷雨急暑夜雪霜寒鐵

騎秋呼鶻金盤曉薦驩柳營弓劒滿容我一儒冠

開平即事

百萬貔貅擁御閑灤江如帶綠迴環勢超大地山河上  
人在中天日月間金闕觚稜龍虎氣玉階閭闔鷺鴒班  
微臣亦有河汾策願叩剛風上帝關

天開地闢帝王州河朔風雲拱上游鵬影遠盤青海月  
雁聲斜送黑山秋龍岡勢遶三千陌月殿香飄十二樓  
莫笑青衫窮太史御爐曾見袞龍浮

呈杜醉經參政

君不見貞觀天子開龍祚黃閣中羅真宰輔河海如鏡  
淨無塵但有清風一萬古城南尺五今耳孫英聲直欲  
凌鼻祖太華山高黃河寒盡收淑氣歸肺腑醉經堂前  
耿青燈深味道腴探鄒魯萬殊同本豈獨醉要使六合  
皆鼓舞舞紫仗曉御明光宮絳紗芙蓉明玉斧曰汝參贊  
中書權左臯右夔接步武相印金窠紅屈盤巍押千官  
坐政府南金象齒奏北闕御河疎柳聞健櫓旱火不光

春融融禾麻連空賤如土天下蒼生見雍熙擊壤嬉笑  
無所苦史臣猶能作頌聲他年願繼尹吉甫

戚學士有家藏仲長統

關隱

宋齊彥趙

子昂有詩次韻

老瞞盜漢鼎不下安漢公參軍著昌言何如草玄雄一  
壑豈不美奈此塵囂中居然不成往千古空悲風東京  
名節士偉哉五噫鴻山間變姓名詎肯隨旌弓

贈太原卜者張開夫

張生千載後讀易見天心萬象有奇耦一天無古今疎  
簾垂晝寂短榻卧秋陰自筮何時達霜華已滿簪

送羅子有奉亦愚右丞之喪歸杭

風沙萬里一征鞍短帽疎髯淚未乾廣武山川空阮籍  
長平賓客只任安故園有夢鵲聲急大厦無依燕翅寒  
江左故人如見問為言燈火客金鑾

呈張上卿

尚方勅賜紫金冠詔領諸仙玉府班神變紫芒雙劍上



家傳黃石一編間瑤壇蘼罷鵷班靜金闕朝回鶴馭閒  
為問清生符在否有人望氣倚函關

送修撰輔伯賢同知滑州

又作州官去秋霜點髻紗風生白馬渡月冷紫薇花三  
金娛親老雙旌放吏衙重來定何日雲路有靈槎

承旨樂山唐公八月十二日宴于其第以詩奉呈

聖代開皇極恩波雨露沾篤生嵩嶽佐載叶渭川占社  
稷千齡會衣冠五福兼朱絃新律呂黃石舊韜鈴德望

三朝眷儀刑四海瞻擣詞追賈馬勵學探義炎宇宙歸  
青照風雲奮紫髯議如唐陸贄詩似晉陶潛踐履剛而  
毅精神智以恬一區楊子宅萬軸鄴侯籤山色秋凝壁  
烟光晝捲簾金鑾辭秉燭玉鉉待調鹽大匠規模遠宗  
公號令嚴王臣躬蹇蹇君子德謙謙此日鳴朝鳳清秋  
近夜蟾瑤簪環杖履寶墨出湘縑北海賓長滿東山屐  
未厭車聲闐繡戶花影舞朱簷樂幸追靈運憂當後仲  
淹願施經濟具天下待鍼砭

春日遊江鄉園

一名小城南

城南三月花亂開  
花間羯鼓聲如雷  
蟬衫麟帶誰家子  
笑騎白馬穿花來  
美人如花映碧水  
榴裙吹舞金鵲尾  
手折楊枝擲水中  
腰褭如弓送窮鬼  
人言此是上河梁  
滿川羅綺東風香  
年年窮鬼送不了  
波心驚起雙鴛鴦  
蓮莖一寸綠芒短  
老盡碧桃春不管  
遊人醉歸夜迢迢  
十二天街御烟暖

野莊公年過七十以詩為壽

北嶽開葱蘢中朝列艾厖聲猷今第一氣量古無雙乙  
夜陪宸蹕丁年擁帥幢扈龍踰瀚海躍馬渡岷江善化  
行鄜邠威名振冉駹儀曹尊北府丞相式南邦鳩扈敦  
農稼烏臺戢吏囑諫租寬杼軸議戰偃矛鏃霄漢常騰  
鶚郊原不吠虓信知天有柱始覺水無涖焜燿青藜杖  
穹窿碧瑣牕清絃調大呂巨筆奮長杠奧學蠡難測雄  
詞鼎可扛富惟儲古帖老不廢寒釭教義燕山寶遺安  
峴首龐一門風穆穆百世澤淙淙喜見麟垂紱還斟蟻

泛缸占熊符舊兆飛鶴度新腔晴雪浮籩豆春風扇杞  
控僕雖慙鴛鈍公每念愚憊鑛喜洪鑪鑄鐘容寸筵撞  
陳蕃猶下榻張籍已收瀧願繼周南雅長歌福祿降

至元壬辰呈翰林院請補外

微臣官蟻虱無力報乾坤政爾廣文館何如神武門世  
情三峽險歸夢五湖昏朝市山林上無非荷國恩

萬里家書到催歸未得歸山妻愁掩袂稚子病牽衣客  
舍園林僻官曹簿領稀清時鴛鴦滿容得一鷗飛

索米長安市光陰電影移酒尊貧不飲藥裏病相隨憤  
激櫻桃賦淒涼苜蓿詩臣心清似水暮夜有天知

送應奉張幼度同知冠州

張子美少年濯濯春月柳夜牕三尺琴六籍洞戶牖我  
遊承明廬見此真益友金匱共校讎過眼十八九僚吏  
坐俗談語乃不出口美哉德如玉溫縝世未有近詔開  
東觀天童爛瓊玖我本木強人技已陳芻狗君胡亦不  
留得州大如斗男兒抱奇氣榮進付之偶血指古則然

今何忽袖手但莫負所學千載有不朽北風號枯桑落  
葉滿林藪過君薊南門山色照尊酒監州豈不佳千里  
離父母願回判花筆桑麻勸南畝竹馬歌兒童定勝牛  
馬走明年我南歸雲卧鼻雷吼當哦山中詩寄君一搔  
首

寄揚州教胡石齋

淮海胡文學名猶滿帝都人誰憐李白我欲泣楊朱家  
昔啼飢甚身今病渴無竹西歌吹近想見列生徒

昔日光明闕昂然有此翁不聞前賈傳俄見罷申公瘦  
已肩如鶴貧猶氣似虹北門端有待豈必滯儒宮

陳剛中詩集卷三



欽定四庫全書

陳剛中詩集附錄

元史列傳

梁曾字貢父燕人祖守正父德皆以曾貴贈安定郡公曾少好學日記書數千言中統四年以翰林學士承旨王鶚薦辟中書左三部令史三轉為中書省掾至元十年用累考及格授雲南諸路行省都事佩銀符久之陞員外郎十五年轉同知廣南西道左右兩江宣撫司事

明年除知南陽府唐鄧二屬州為襄陽府所奪曾按圖  
經稽國制以聞事得復舊南陽在宋末為邊鄙桑柘未  
成而歲賦絲民甚苦之曾請折輸布民使之十七年朝  
廷以安南世子陳日烜不就徵選曾使其國召見賜三  
珠金虎符貂裘一襲進兵部尚書與禮部尚書柴椿偕  
行至安南語秘不傳明年日烜遣其叔遺愛奉表從曾  
入獻方物帝封遺愛為安南國王賜幣帛遣歸二十一  
年除曾湖南宣慰司副使居三年以疾去二十九年改

淮西宣慰司副使復以親老辭召至京師入見內殿有  
旨令曾再使安南授吏部尚書賜三珠金虎符襲衣乘  
馬弓矢器幣以禮部郎中陳孚為副十二月改授淮安  
路總管而行三十年正月至安南其國有三門中曰陽  
明左曰日新右曰雲會陪臣郊迎將由日新門入曾大  
怒曰奉詔不由中門是我辱君命也即回館既而請開  
雲會門入曾復執不可始自陽明門迎詔入又責日燭  
親出迎詔且講新朝尚右之禮以書往復者三次具宣

布天子威德而風其君入朝世子陳日燭大感服三月  
令其國相陶子奇等從曾詣闕請罪并上萬壽頌金冊  
表章方物而以黃金器幣奇物遺曾為贐曾不受以還  
諸陶子奇八月還京師入見進所與陳日燭往復議事  
書帝大悅解衣賜之且令坐地上右丞阿里意不然帝  
怒曰梁曾兩使外國以口舌息兵戈爾何敢爾是日有  
親王至自和林帝命酌酒先賜曾謂親王曰汝所辦者  
汝事梁曾所辦吾與汝之事汝勿以為後也復於便殿

賜酒饌留宿禁中語安南事至二鼓方出明日陶子奇等見詔陳其方物象鸚鵡于庭而命曾引所獻象曾以袖引之象隨曾轉如素馴者復命引他象亦然帝以曾為福人且問曰汝亦懼否對曰雖懼君命不敢違帝稱善或讒曾受安南賂者帝以問曾曾對曰安南以黃金器幣奇物遺臣臣不受以屬陶子奇矣帝曰苟受之何不也可也尋賜白金一錠金幣二勅中書以使安南三珠金虎符與之仍乘傳之任淮安到官興學校勵風俗河南

行省事有疑者皆委曾議之大德元年除杭州路總管  
戶口復者五萬二千四百戶請禁莫夜鞠囚游街酷刑  
朝廷是之著為令四年丁內艱先是丁憂之制未行曾  
上言請如禮七年除潭州路總管以未終制不赴明年  
遷兩浙都轉運鹽使又明年拜雲南行省參知政事賜  
三珠金虎符尋召還京辭以母喪未葬扶柩北歸至長  
蘆有旨賜鈔一百錠使營葬十年召為中書叅議嘗預  
燕賜濟遜一襲十一年轉正奉大夫出為河南行省參

知政事尋遷湖廣行省參知政事四年以疾辭歸勅賜  
藥物存問備至皇慶元年仁宗以曾前朝舊臣特授昭  
文館大學士資德大夫累章乞致仕不允復起為集賢  
侍講學士國有大政必命曾與諸老議之延祐元年奉  
詔代祀中岳等神還至汴梁以病不復職寓居淮南杜  
門不通賓客惟日以書史自娛至治二年卒年八十一  
卒之前十日有大星隕于所居流光燭地人皆異之

元諭安南國詔

上天眷命皇帝聖旨諭安南國陳日燭省表具悉去歲  
禮部尚書張立道奏言曾到安南識彼事體請往開諭  
使之來朝因遣立道往使今汝國罪愆既已自陳朕復  
何言若曰孤子在制及畏死道路不敢來朝且有生之  
類寧有長久安全者乎天下亦復有不死之地乎朕所  
未諭汝當具聞徒以虛文歲幣巧飾見欺於義安在故  
茲詔示想宜知悉

元奉使與安南國往復書



朝廷奉使吏部尚書梁曾禮部郎中陳孚謹致書于安  
南國蓋聞禮者敬而已敬孰為重敬君為重敬君孰為  
先敬君之命為先君天也君之命天之風霆也其敢不  
敬乎在禮君言至則臣出拜君言之辱使者返其拜送  
于門外至而迎返而送禮也迎必拜送必拜禮也迎送  
必拜于門外禮也安南詩書之國嫺于禮者也明詔之  
至盡禮必矣何待於議然威儀之節行人未有聞焉大  
懼弗虔無以對揚聖天子之命夫以天威不遠顏咫尺

綿叢未習而遽以行之是謂褻天之威斯戾也已用敢  
布于執事其稽故典及疆而請事及郊而迓及門而拜  
及阼階而拜以受悉以升降俯伏之序條諸篇章明以  
告我嘉與擯紹者觀焉母忽至元三十年正月初一日  
書

孤子致書天使大相公帳下茲審華轡星臨滿城春  
動便覺有生意矣寶翰中諭以迎接天詔事足俛存  
念之篤感甚感甚迎接天詔之禮自古有之祖父歸

順以來已定常典矧孤之身敢不克盡謹特差本國  
執政臣黎克復出疆遠迓於其國內禮節使旆至日  
冀垂教誨山嵐瘴癘恐非久駐之地幸惟早命膏秣  
以慰拳拳之望敬此回書切希鑒念不宣至元三十  
年正月十三日書

朝廷奉使吏部尚書梁曾禮部郎中陳孚謹致書于安  
南國嘗聞古者天子遣使于四方教之曰必咨于周周  
也者忠信而已曾等仗節萬里祇若聖天子之不顯休

命非遊說之士憑軾掉舌者也今有忠信之言將為執事告慮重譯弗詳不足以敷露悃悞故筆諸書我大元以神武定天下天戈所指靡有不服薄海內外寸天尺地悉歸職方太平混一之盛自開闢以來未之有也安南內附三十餘年于茲國家威德聞之熟矣不必縷言詩曰殷鑒不遠在夏后之世姑以亡宋近事言之宋自先世尊事天朝使价之往來殆非一日中忽改圖負固拒命變詐百出不可億逞歲戊午憲宗皇帝躬行天討

師出夔門，聖上濟自江漢，次于鄂渚，將深入焉。賈似道使宋京祈哀于我，願奉歲貢，請罷兵。息民會振旅北還，宋輒包藏禍心，乘時僥倖，邀截我師，將佐後殿者執為軍實。幽遠方者有之，隸伍籍者有之，受俘獻捷，刻石頌功，欺天罔人，上下交賀，以為江左中興，殊不知宋之亡滅，實基于此。昔鄭人獲蔡司馬公子，變國人皆喜，惟子產憂之，曰：「小國而有武功，禍孰大焉？」季武子以齊之兵作林鍾，以銘魯功。臧孫曰：「小國幸于大國，昭所獲焉，以

怒之亡之道也宋無子產之智而犯魯之不韙譬猶鳥  
雀偷生逢蒿人以鷹鷂偶搏之不中遽謂力能勝之欲  
奮而與之角不死得乎聖朝之法賞延于世同符唐虞  
父為萬戶侯父陷則子襲之兄為千夫長百夫長兄陷  
則弟襲之凡已未以後熊羆之士摧鋒破陣執銳先登  
者多陷于南將佐之子之弟也上思敵天子之愾下思  
報父兄不共戴天之讐瀝肝奮膽怒自百倍並請喋  
血于宗聖上至仁如天念南北生靈皆國赤子冀宗悔

禍或有令圖首命翰林學士郝經持書往使乃食言背  
約執之不使復命既又誘我邊人李壇假以官職啗以  
金帛資以甲兵教以內叛天下之惡一也不忠於我豈  
忠于彼者乎復有姦慝之徒懼罪亡命訾短中國以自  
媒其身而聽其狡謀構罪弗已蹂我連海軼我巴蜀虔  
劉我邊陲蕩搖我生聚我是以有襄樊之圍彼猶不悛  
人神共怒左右皆曰可伐聖上乃命右丞相興師問罪  
長江飛渡席卷吳楚錢塘之城望風而下宋於是時方

納質子歸使者返侵地釋將佐之囚吁晚矣社稷丘墟  
君臣共虜固天運有歸亦人謀有以致之也自昔弱敵  
強寡敵衆借一則可終則必敗蓋窮國之力而無以繼  
之政如疴疾之人表證雖差而真氣索矣況宋主既死  
嗣子孤立非有父母拊循之恩股肱以勢偏而離心爪  
牙以志滿而解體舉國宴安不虞後患卒臨之以重兵  
人不堪命土崩瓦解此宋徂于已未僥倖之害也暨幼  
主就擒聖主憐其孀獨不以祖父之罪罪之猶待以不



死如天之仁斷可見矣使宗當此已未之後能自省悟  
思將佐士卒留于南者彼無一毫之益此無一毫之損  
奉使還北則子弟之怨不深殄殲乃讐未必若是極也  
國使之至禮而歸之則問罪之師未必舉也稽首請命  
遣質入侍弗替事大之禮邊人之叛弗納疆場之舊弗  
亂堯舜在上未必遽泯其社稷也欽以太祖聖武皇帝  
奕奕聖謨著在清廟若曰敢以顛越弗恭鳴張矯虔從  
而征之必誅無赦其赤心效順幡然來歸寵之封爵錫

之茅土已往之愆一切弗問垂訓萬世昭如日星獨不見高麗乎高麗之王克篤忠貞為國藩屏位至上相勲列柱國世祚其王以表四海玄菟樂浪之間民恬物熙雖犬相聞視宋之覆宗絕祀為何如也安南土地人民與夫城池之固兵革之利何敢望宋萬分之一二矧舊臣于宋必知宋之啓釁召禍者矣亦思本國之事或有與類者乎比者王旅徂征微有失利聞諸道路以謂安南似有矜色曾等殊未之信嗚呼此宋之覆轍也安南

其肯路之乎聖朝用兵不急近效不顧小失今日攻弗  
下則攻明日今年戰弗克則戰明年至于四伐五伐六  
伐七伐不勝不已不得不休積以歲月卒成大業舜之  
格有苗高宗之伐鬼方是也一將死一將復出一軍散  
一軍復合見可而進知難而退亟戰以罷之多方以誤  
之始雖垂翅終乃收功養威持重以至無敵于天下高  
祖之平項羽光武之擒赤眉是也豈若輕躁之兵舉趾  
高而心不固再而衰三而竭者哉一勝一負兵家之常

君臣之尊卑天下之大經也安南亦既知之數世以來  
修貢弗缺可嘉也已然事上以實不以文若不束身入  
朝徒恃區區之幣遷延粉飾求保其國是以豚蹄斗酒  
祈汙邪甌窶之滿不亦難乎聖上明照萬里之外省所  
上章深自引咎重選信使復賜溫詔恩至渥也恩不可  
以屢得使不可以屢至安危之機在此一舉惟遠考三  
代兩漢征伐勝敗之驗近鑒宋之所以亡高麗之所以  
存上遵天子之詔下察行人之辭絕去多疑一以誠敬

乘此自新之路趨造于朝瞻覲天威剖符而還以奠南  
服則帶礪山河永垂苗裔令聞長世輝耀竹帛將自茲  
始男耕婦織桴鼓晏然無復昔之驚竄駭伏越在草莽  
豈惟宗祧之慶諸大夫國人實嘉賴之古人有言曰識  
時務者在乎俊傑逆順禍福坦然明白失今不圖悔無  
及矣執事者審思焉至元三十年二月二十日書

孤子書復天使大相公閣下孤辱蒙華翰圭復垂三  
足伋教愛之篤感激感激孤臣事天朝自祖至今三

十餘年歲貢不絕雖兩遭兵火終始一心所得罪者  
獨不能造朝耳孤豈不知禮有君命召不俟駕然其  
如常情貪生畏死何鳥高飛魚深逝猶且惟生是懷  
況人乎若夫天下無不死之地古今無不死之人達  
此理者惟有佛也人誰能之敝邑之去天朝間關萬  
里相公諒已備知設若孤以區區弱質強為是行其  
不死亡于道路者鮮矣孤之死亡固不足恤得不傷  
乎聖朝愛人及物之仁也乎書曰君天也孤之事君

甚于事天天無階而升然猶可以朝夕而對越君無階  
而覲然猶可以朝夕而向慕孤若不量力而行其復欲  
求對越向慕得乎孤託以故人之義語言不忌心腹  
若剖幸惟相公曲為孤子熟圖之萬勿吝教不宣至  
元三十年二月二十一日書

朝廷奉使吏部尚書梁曾禮部郎中陳孚謹致書于安  
南國曾等弭節而南見世子者屢矣每見必曰小國之  
事聖朝猶事天也然僻在一隅孤陋寡聞懼弗免于大

戾天使辱貺下國惟是安危禍福繫于一言矜其不開而賜之教誨使獲保其人民君之惠也敬同詞以謝弗獲因思古之君子使於四方必有專對也惓惓悃悃若是其至乎故即宋與高麗逆順存亡之實論著為書以告執事者頃之國老丁公文及其大夫黎克復何維嚴實來致世子之語曰世子與天使共為帝臣然天使先進世子後進也以齒則天使兄也世子弟也茲以聖天子之命鎮撫其社稷寵之以書為賜厚矣然蘊奧難見



猶未知所以教也幸勿憚再三之瀆明以教我所謂生  
死骨肉者敢固以請翼日世子躬造舍館且復以書曰  
孤以故人之義惟曲為孤子熟圖之萬勿吝教嗚呼世  
子賢乎哉夫以惓惓悃悃求言若是其至而猶有靳焉  
仁者用心不若是恕也今有二說以復于執事一曰身  
親入朝臣子之職分也今書曰豈不知禮有君命召不  
俟駕其如常情貪生畏死何鳥高飛魚深逝猶且惟生  
是懷況人乎噫魚鳥何知之有人為萬物之靈死生之

理當了然于胸中天詔固曰天下復有不死之地乎夫  
死生有命大期將至不出戶庭死矣豈獨道途之遠能  
死人哉如其未也惠徼天子之福道途雖遠又何患焉  
且以民人為念而憚一己之跋涉不思有以濟之非善  
于謀國者也事固有一勞而可以永逸者今趣嚴入朝  
計道途往來不過一歲而永守其國安若磐石此策之  
上者也二曰子者身之貳也昔南越在漢曾遣子嬰齊  
入覲矣旋踵而還紹父之緒為賢諸侯蓋生于遐方而

見中華衣冠禮樂之盛所益多矣今聞世子之長子年  
幾弱冠與其居于深宮長于婦人之手孰若使之躍馬  
萬里觀上國光乎嘗讀世子所上表有曰人有得面聖  
者為千載一遇善哉言乎夫身所以未往者以國不可  
以無主故也至于子則又何辭焉且人之有子將以幹  
父之蠱也國有大事身既未往惟子可以代之不以子  
代之區區一介陪臣可以回聖天子之意乎否也人孰  
不愛其子世子思國之大事則不可以姑息為愛能遣

其子親詣闕下就帥往者落南官軍將佐及奉所侵疆土祈哀請罪天其或矜朝廷從而矜之必因其子以封其父亦必不使其子久淹恤在外畢事反命父子皆受寵榮而國定矣此其次也若夫奉琛飾幣從事虛文之末不以骨肉近臣而使異姓之卿備員以往是欺天也有明詔在行人不敢與聞曾等二人者皆讀聖人書生平履踐維一忠信屋漏無所愧暗室無所欺天地鬼神不可誣也今以世子惓惓悃悃求言若是其至故以二

說告言不忠信天地鬼神實照臨之惟執事加之意不  
宣至元三十年二月廿有一日書

孤子書復天使大相公閣下孤不肖伏蒙不鄙累辱  
賜書詞豐誼渥愛踰骨肉足似故人拳拳之意敢不  
盡布腹心以叙萬一如造朝一節孤伏其辜矣蓋恃  
聖朝如天之仁故每每陳情哀請相公諒已知之茲  
不復贅且如入朝臣子之榮事也孤豈不欲以子往  
奈其口尚乳臭筋骨未壯不習鞍馬不慣風霜將如

道路何孤年踰而立尚慮不保此身況小子乎若其視之以嬰齊故事則是又重孤之罪也官軍將佐或有遺落乎敝邑者孤父在日已盡搜索如昔戾機夫王部屬烏馬樊參政老少孫路蠻何奉御唐兀斃吉羅氏唐萬戶胡英郭全及萬戶千戶頭目官軍等輩並已隨次送還訖其餘或瘴死或逃歸者則孤所不知也張尚書至日已嘗言之孤尋問村落諸處至今未有所得孤豈有惜此數人而棄忍一方生靈者

哉且孤之所以送還者果有朝旨也抑孤自為之耶  
彼之在此適徒自取費耳于損益乎何有孤自先父  
去後茹素持經放生物命猶慮不足以報父恩之萬  
一況復有囚殺天朝之將佐以累先父于地下者哉  
相公雖以是見屬孤固不待言如侵越疆界事斯言  
尤不可信也詩曰普天之下莫非王土率土之濱莫  
非王臣小國雖僻在一隅亦大國臣土也邇年方遭  
兵火百姓死亡田地蕪廢相公之所目擊今以敝

邑之地十室九空猶且不足何暇及其餘乎今以小國臣事大國祇粟戰懼猶恐不保何敢萌此驕心乎向者天使往來累造小國迎送于鹿州小國懼其侵越之罪往往避之但止丘溫而已孤言不信尚有諸天使在今相公所諭有還疆言語誠為大懼孤素無侵疆之意而敢有還疆之辭乎相公既諭之孤亦當戒約其邊勿妄生事以體孤事天之誠也夫物所以表誠也傳有獻芹詩有澗溪沼沚之毛蘋蘩蕓藻



之菜筐筥錡釜之器潢汚行潦之水可薦于鬼神可  
羞于王公蓋在誠非在物也孤僻在炎荒之外遠隔  
天日其所以表誠者在乎土宜而已今相公乃以為  
虛閒不足以見事君之誠則孤將安所寓誠哉有以  
寓誠猶不能免其罪戾至于無所寓誠則其罪戾又  
當何如耶竊惟孤之身既不能造朝孤之子又不能  
入朝舉國驚惶莫知所措惟有盡其心力託其性命  
強遣一介心腹老臣代詣天闕陳罪今相公所諭且

有骨肉近臣之語孤未審何若人抑兄弟耶抑宗族耶抑心腹老臣耶孤不肖皇天不恤凡兄弟宗族皆無知之人不通古今不達時事設以一人強為此行不惟獲罪于天朝抑又恐貽禍于小國往輩是也相公豈不知之孤以為兄弟宗族名雖至親或為仇讐心腹老臣名雖人臣實則父子孤未審相公之意將用名耶用實耶苟欲用虛名而不用實不惟孤自負不能盡情之罪而相公亦有棄實取虛之累也孤之

此言未免巧飾文詐幸惟相公曲盡其情而矜原之  
孤安危死生之機繫相公三寸中儻蒙以恤孤為念  
字民為心特為宛轉一語上達天聽陳六尺無託之  
情明一方無告之意豈非孤一國生靈獲拜于天地  
父母之賜雖先祖父聞之地下亦不知手之舞之足  
之蹈之也區區圖報惟有心香一瓣奉之冥冥不宣  
至元三十年二月二十五日書

朝廷奉使吏部尚書梁曾禮部郎中陳孚謹致書于安

南國茲厯顯价寵以餽臚行人何以及此君子砥身礪  
行猶冰玉也曾等不敏嘗獲聞薦紳先生之訓矣使乎  
使乎而一旦隳其平生之素磷緇不既甚乎且自下車  
以來惟是脯資餽牽所以辱候人者多矣屬厭而已又  
焉用此若以情義之篤有不容釋者繼自今以往惟忠  
與孝一德以尊天子使行人獲免于戾則受賜深矣  
不在貨也所有上件餽饌敬用返璧不宣至元三十年

三月初一日書

孤子書復天使大相公閣下茲者伏辱華轡星臨第  
愧敝邑蕭條無可以為長者待旆回僭以區區菲物  
為餞禮也來翰謙撝卻之閣下之誼高矣其如禮何  
孤謹當分付本國使臣齎到望俯領之若夫圖報寸  
忱則是又在心不在物也敬此回文切希鑒念不宣  
至元三十年三月初一日書

元安南國進萬壽頌并表奏

天錫皇帝帝錫庶民臣祝聖壽億萬年春

至元三十年三月吉日安南國臣陳日燭百拜進臣  
日燭言伏以帝齡億萬方八千歲春秋之初華祝再  
三況五百里要荒之外普天交慶曠古未聞臣日燭  
誠懽誠忭頓首頓首欽惟憲天述道仁文義武大光  
孝皇帝陛下聰明日躋勇智天錫以一怒而安天下  
以五福而錫庶民奄有四方自漢唐所無之事不遺  
小國即堯舜所用之心有執而有容得名必得壽臣  
日燭南荒坐井北面拱辰三十年犬馬拳拳一寸心

天日皎皎俯陳金鑑徒懷金闕之瞻遙奉玉觴深望  
玉闕之閉臣日燭謹齋沐親自撰寫萬壽頌一章填  
以金冊封以金函差陪臣陶子奇等奉表稱賀以聞  
臣日燭無任瞻天望聖激切屏營之至誠懼誠忤頓  
首頓首謹言至元三十年三月初四日安南國臣陳  
日燭表

安南國臣陳日燭謹昧死頓首百拜上言臣伏于今  
年一月十四日恭覩天使吏部尚書梁曾禮部郎中


陳孚奉賁天詔俯臨下國臣日燭謹率宗族官吏奔走道路焚香迎迓及至褥道躬迎三熏百拜跪讀天詔曰汝國罪愆既已自陳朕復何言聖天子涵洪寬大如此臣日燭等不勝歡喜踴躍之至自謂數十年父子滔天之罪迄今日冰釋矣存者亡者均拜天地父母更生之賜中間諭以有生之類寧有長久安全者乎天下有不死之地乎臣日燭固知古今無不死之人天下無不死之地而所恃者有好生之天聖天



子以天為心恤孤字小一視同仁則小國可以長久  
可以安全可以不死否則何往而非死地也天詔又  
曰徒以虛文歲幣巧飾見欺于義安在臣日燭伏讀  
至此精神遐漂肝膽墮落雖生若死雖存若亡臣日  
燭此身不幸莫大既不能生于天子之朝又不能造  
于天子之庭其所以表誠者在乎土宜而已臣日燭  
豈不知聖朝天覆梯航萬方奇貢珍寶靡所不有初  
何以區區小國進獻為哉然臣日燭猶不顧其罪而

復為是冒昧者誠為事君之義有不可廢也在天詔  
雖以為于義安在在臣下其敢廢職耶伏望皇帝陛  
下父母其心乾坤其量包荒含穢曲賜矜存念臣祖  
臣光炳赤心歸順忝受封冊俾臣日燭襲恩供職修  
貢如故上以克盡事君之誠下以克成先祖之志豈  
惟微臣一介獲保苟延殘喘抑亦一方生靈同享天  
地好生之大德區區犬馬寸誠臣日燭自謂雖千生  
萬死粉骨碎身亦不足以圖報聖恩之萬一也臣日

燭無任祈天叩聖昧死之至謹奏至元三十年三月  
初四日安南國臣陳日燭奏



陳剛中詩集附錄